



A lokisetse Morena Sechaba se phethehileng (Luka 1,17)

Tel: 28 350 466/ 62600983 (WhatsApp)

M5.00

MOELETSI OA BASOTHO

PARARE DOMINO PLEBEM PERFECTAM



Mokhhlane o qhomme

6


Tsela e kena meralong

7



BA HEMA KA LEQEBA

www.moeletsioabasothis.co.ls



Re se re fumaneha ho marangrang

Email: newsroom@moeletsioabasothis.co.ls
Tel: +266 28350466/ Whats app: 62600983

MOELETSI

Le boea sekoele

Lithole ha li laoloe hantle



Sesotho se re monna ha bone habeli. Ruri taba ena ea mokhohlane (flu) o qhommeng, ke bona e ka re tla khutlela morao. 'Mali ea khabane o tla hopola lietsahala tsa selemo sa 2020, ha lefatše le hlasetsoe ke seoa sa COVID 19. Haeba mokhohlane oo o se o amme litereke tse tšeletseng kaofela, hona hore ho rona re le sechaba sa Basotho re falimeheng. Re khothaletsa hore hang ha motho a utloa mochoso, hlooho e bohloko, bohloko ba mesifa le manonyeletso, 'metso o bohloko le mamina a mangata, batho ba itlalehe Litsing tsa Bophelo ho fumana kalafo. Ha re qobeng ho utloa ka letlalo ho opa, re nkeng likeletso hoba Lekala la Bophelo.

E kare kokoana-hloko ena e feta ho tloha ho motho e mong ho ea ho e mong ka ho hohlola kapa ho thimola, kapa ha motho a tšoara ka matsoho libaka tse silafetseng, e be ha qeta o itšoara mahlong, linkong le molomong. Na litaba tsee ha li tšoane le tsa mohla monene?

'Me mekhoa ea ho itšireletsa re ntse re e hopola hantle, re tlameha ho koaela nko le molomo ha motho a hohlola kapa a thimola, kapa hona ho roala limonkoana. Hape ho hlapa matsoho ka sesepa ka metsi a phallang le ho qoba hoba libakeng tse nang le tšubuhlellano.

Tlhekefetso khahlanong le basali le bana ha e amohelhe ho hang. Sepolesa sa Lesotho se tsoile ka makhalo hoba le likopano le sechaba, haholo ba shebile batho ba banna, ho buisana ka maano a ho felisa tlhekefetso.

Sepolesa se le mosa banna hore ba tsebe hore ke basireletsi ba basali le bana le banna ba bang. Joale mona hore bontša hantle hore ke khutlela litseleng tsa khale, moo re neng re tseba Lepolesa Mothusi Motsoalle, haele mona joale se kena kahara sechaba ho fana ka thuto e le ho qoba litlolo tsa molao tse ka etsoang ke bannna. Pele ea pele sepolesa sa Motlotlehi se palamang.

Ha litsela li le maemong a matle, hono ho ka nyolla moruo oa naha, kaha seo se tla hohela matseteli esita le ho hohela bahahlauli. Sechaba se bile le mamello ea nako e telele ea ho sebelisa tsela e mpe. Mebuso e lutse e fetoha feela ho se nko ho tsoa lemina. Na ho bohlokoa hore sechaba se etse pontšo ea ho se khotsofala ka ho koala litsela le ka ho chesa litaere ka tseleng? Che. Mona ke ho baka tšetiso ho batho ba bang ho pheta mabaka a bona a letsatsi ka leng le ho nka maeto, 'me ka ho etsa joalo ke tlolo ea molao.

Letona le ikarabellang ke moo le hlahile, ka ho khoba sechaba seo matšoafu le ho se tšepisa hore tsela eo e tla loka. Ka mokhoa o tšoanang MCC le eona hase mokhelo tabeng ena, moo e boletseng hore M80Millione e teng e tl'o ntlafatsa litsela.

Basotho ba setse shalabeng ba likhomo tsa lebese, hobane joale ho koetsoe maliboho ka lebaka la lefu la tlhako le molomo. Taba eo e amme khoebo ea bona ha bohlokoa, hobane joale ba nyolla moruo oa naha e 'ngoe ka lihlahisoa tsa lebese.

Ho fihlela lilemo tse 50 ke pontšo ea mohau le botšepahi ba Molimo. Jubilee ka bo eona e bolela pholiso, poelano le qalo e ncha. 'Mé 'Masenate o bontšitse boitelo tšebelatsong ea sechaba, Lelapa le Kereke. O tsebahala haholo ka ho tšehetsa mesebetsi ea boiketlo ba sechaba, bophelo bo botle, bana le malapa hammoho le ho emela Lesotho liketsahalong tsa naha le tsa machaba. Re holele 'M'a rona.

MOLIMO A BOLOKE LESOTHO LE BASOTHO

Nthabeleng Seitlheko

Tlaleho e ncha ea Ofisi ea Mookameli oa Litletlebo le Moloaneli oa Litokelo tsa Mantlha tsa Botho, Advocate Tlotliso Polaki, e senotse hore Lesotho le tobane le bothata bo bohloko ba taolo ea lithole, kaha karolo ea 80 lekholong ea lithole tse hlahisoang selemo le selemo ha e bokelloe kapa ho laoloe ka nepo.

Tlaleho e bontša hore Lesotho le hlahisa lithane tse ka bang 137,510 tsa Lithole ka selemo, empa ke karolo ea 20 lekholong feela e kenang tsamaisong ea semmuso ea pokello ea lithole. Tse ling tse ka bang lithane tse 110,000 li lahleloa libakeng tse seng molaong kapa li chesoa libakeng tse bulehileng.

Boemo bona bo beha

bophelo ba sechaba kotsing, haholo basebetsi ba bophelo bo botle le batho ba bokellang lithole, ba ka hlahang kotsi ke linale tse nang le litšoaetso le litšila tse kotsi tsa lipetlele. Tlaleho e boetse e re khaello ea lisebelisoa tsa tšireletso tse kang liatlana, lieta le limonkoana e mpefatsa boemo.

Mookameli oa Litletlebo o re libakeng tse ngata tsa naha, libaka tsa lithole li silafatsa mobu, metsi le moea. O boetse a bontša hore lithole tsa litsing tsa bophelo hangata ha li aroloe hantle.

Lipatlisiso li sibollotse hore taolo ea lithole e fetiselitsoe ho makhotla a lehae, empa sena ha se'a ka sa tsamaea le lichelete tse lekaneng, basebetsi ba nang le boiphihlelo kapa lisebelisoa tse hlokalahalang.

Tlaleho e boetse e supa hore Lesotho ha le na se-

baka sa sejoale-joale sa ho lahlela lithole (engineered landfill), 'me bohloko ba lithole bo qetella bo lahleloa libakeng tse bulehileng tse haufi le matlo le likolo, moo bana ba bang kotsing.

Har'a likhothaletso tsa tlaleho, Lekala la Puso ea Libaka le laeloa ho matlafatsa melao le maano a taolo ea lithole, ho eketsa basebetsi ba nang le litsebo, ho batla mehloli e tsitsitseng ea lichelete, le ho aha sebaka sa sejoale-joale sa ho lahlela lithole Tšoeneng nakong ea lilemo tse tharo tse tlang.

Mookameli oa Litletlebo o re taolo e nepahetseng ea lithole ha se taba ea tikoloho feela, empa ke taba ea bophelo bo botle ba sechaba le tokelo ea molao-motheo ea batho ea ho phela tikolohong e hloekileng, e sireletsehileng le e phetseng hantle

Contacts: +266 28350 466

62600983 WhatsApp

Email: newsroom@moeletsiobasotho.co.ls

Sales and Marketing: (+266) 28 350 466/ 57396597 (WhatsApp)

MOELETSI oa BASOTHO
A LOKHETSE MORENA SECHABA SE PHETHEHLENG (LUKE 1:17)

EMAIL: editor@moeletsiobasotho.co.ls

sub-editor@moeletsiobasotho.co.ls

Mohale Lehlohonolo (Sub-editor)

(+266) 58 771 507 / 62 771 507

Journalists

Nthabeleng Seitlheko

Tšeliso Thakholi

Production Desk: 'Mateele Liqa

57 665 038/ 68 216 271

58 540 853/ 63 480 404



Bahlahisi ba sala shalabeng

Nthabeleng Seithleko

Barui ba likhomo tsa lebesa ba hema ka leqeba, kamor'a ho koaloa ha maliboho ka lebaka la lefu la tlhaku le molomo, hajoale chelete ea naha e hoholeha haholo kaha Lesotho le amohela tlhahiso ea 80% ea lihlahisoa tsa lebesa ho hlaha Afrika Boroa. Litaba tsena li hlalositsoe ke Abisi Alosi ho hlaha Lefapheng la Liphoofole le Bophekoli, puisanong le Koranta, ka la 3 Phupjane monongoaha.

O itse lipalo-palo tsa 2017 le 2024, li supa ha naha e hlahisa 25% ea lebesa le lihlahisoa tsa lona. O re hajoale lihoai li eme hlooho, kaha ba sa atlehe ho reka likhomo Afrika Boroa hobane maliboho a koetsoe ka lebaka la mafu. A re hajoale naha e hlahisa 20%, e lahlehela ke 80% e rekang lihlahisoa kante ho naha. "Lesotho ha le itlhalisetse ke kahoo le lulang le phela mahetleling a Afrika Boroa, eleng ho bakelang naha bofutsana." A hlalosa joana. O re ho latela lipalo-palo tsa 2022- 2023, Naha ea Lesotho e lahlehela

ke bonyane M120,300. 000Millione e rekang lihlahisoa tsa lebesa kante ho naha.

Nchele Koleile eo eleng setsebi sa lehae tlhahisong ea likhomo tsa lebesa, o hlalositse hore likhula-khulano tsa tsamaiso litabeng tsa tsamaiso ea lefapha lena 'moho le lipolotiki li senya bokamoso ba lefapha, eleng se sitisang kholo ea lona. "Bothata bo boholo ke hore motho e mong le e mong o tsamaisa lintho

kamoo a ratang. "A hlalosa joana.

H'a phethela o ipilelitse ho batho bohle ho tsoarana ka matsoho ho loanela tlhahiso kahar'a Naha ea Lesotho. O re tšebeliso ea chelete e lokela ho laoloa hore moruo oa naha o tsebe ho ntlafala, eseng naha e ntlafatse moruo oa linaha tse ling.

Ka lehlakoreng le leng, Ntšiuoa Mokoali ho hlaha Sekolong sa Temo, o bontšitse hore lipolotiki li senya boleng ba tlhahiso

ea lihlahisoa tsa lebesa le temo, hobane matona a hira sepolotiki a lebala baithuti ba etsang lithuto tsa temo ba nang le litsebo le thahasello ea litaba tsa temo.

"Naha e lokela ho ela hloko baithuti haholo ba temo e fapakaneng hore ba ntlafatsoe, le ho tšehetsoa litabeng tsohle tsa temo." A hlalosa joana. A re ka tsela eo naha e ke ke ea lahlehela ke chelete ho sa hloka hahle.

E mong Dai Harvey ho hlaha Royal Jersey Agriculture and Horticulture Society, o hlalositse hore Basotho ba lokela ho hlalohisa ho etsa khoebo e phelang, ho itlhalisetse lihlahisoa tsohle tsa lebesa ho theola tahlehelo e holimo ea chelete e rekang lihlahisoa kante ho naha.

Morero o moholo oa hloa qholotso ea bofuma

le ho phahamisa phepo ea bana e nepahetseng. O re leha phetoho ea boemo ba leholimo e le qholotso e amang linaha tse ngata lefatšeng, empa ba eme ka matla ho hloa boemo boo ka ho khothaletsa lihoai ho ruoa likhomo tsa lebesa tsa 'jersy' kaha li phela maemong ohle a leholimo.

E mong oa barui ba likhomo tsa lebesa Ntai Ramathe, o itse ho koaloa ha maliboho ho ba siile lepala-paleng hobane ba sitoa ho ka tsoelapele ka litheko tsa likhomo, e leng se matlafatsang tlhahiso ea bona. O re ba se ba e-na le nako ba sitoa ho tsoelapele ka khoebo. "Hantle ke nako ea hore re itlhalisetse, chelete ea naha ena e senyehang e ngata haholo e phelisa Afrika Boroa." ke eena eo.

O re ba lokela ho fumantšoa tšehetso e kholo hore naha e tsebe ho hloa qholotso ea tlhokahalo ea mesebetsi, bacha le basali ba kenelle leruong la likhomo tsa lebesa.

Mazenod PRINTING WORKS (Pty) Ltd
57396597
28 350 815
28 350 466
lesaoanat@gmail.com

Malebela

Scan me

U se u ka fumana buka ea Malebela ho marang-rang a boletsoeng ka tlase kapa oa sebella code e kahollimo.

"Get the Akello app on Play Store, App Store, or Huawei App Gallery for Mazenod books and more. Download now!"

<https://library.akello.co/downloads>

akello

Notice in terms of section 61 (b) of the Administration of Estates and Inheritance Act. No.2 of 2024;

ESTATE LATE MAMOKOENA ROSE ALICE CEKWANE EH61\2026

Notice is hereby given in terms of Section 61(b) of Administration of Estates and Inheritance Act No.2 of 2024 calling upon all creditors of the deceased to lodge their claims with the administrator of the deceased's estate within thirty (30) days of this publication.

The address at which the said claims can be lodged is mentioned hereunder;

LIFOFANENG
QACHA'S NECK
(+266) 56440160

BEKILIZWE CEKWANA
(THE ADMINISTRATOR)

MOELETSI O TŠEHETSA BACHA

Tšeliso Thakholi

Khoebo ea ho betla lejoe e bona-hala e le e 'ngoe eo bacha ba ka tsebang ho imona monona ka eona, joaloka Monghali Sello Moruri ea nang le litsebo tse ikhethang tsa ho khabisa le ho betla majoe a mabitla ka mekhoha e fapakaneng, e bile e le e mong oa bacha ba seng a itlhomme-pele ka tšebetso eo Seterekeng sa Berea. O manolla tsa nalane ea hae le boiphihlelo boo a bo fihletseng, ba ho holisa le ho matlafatsa khoebo ea hae. Khoebo ena e fumanaha Lekokoaneng hau-fi le likhoebo tsa mabenkele tseleng e lebang Teya-Teyaneng, Seterekeng sa Berea.

Har'a lintho tse ngata tseo a li etsang ka mofuta oa lejoe le bitsoang lesehoa le fumanehang sebakeng sa Lekokoaneng, ke majoe a ahang, majoe a mabitla, liemahale (litšoantšo) le tse ling tse ngata. Empa ka ho khetholoha o ipabola ka ho etsa hlooho le 'mele bakeng sa lebitla. Ho boetse ho fihlile tlhokomelong ea hae hore mokhoa oa ho iketsetsa merafo ka lejoe la lesehoa le fumanehang ka bongata sebakeng sa habo o pharaletse. Empa bothata ke tlhokahalo ea mechini e ka tabolang lejoe lena, kaha o sebelisa meqala, lichesele le tse ling ho phetha mosebetsi oa hae a nt'o rekisa tseo a li etsang ho batho ka bomong le likampani ka ho fapakana ha tsona.

H'a bua le Koranta ena ka tsa tšebetso ena ea hae e tsoileng matsoho o li beha tjena:

QALEHO

Ho tloha ha ke ntse ke hola haesale ke ntse ke e-na le lerato la ho itšoarela ka matsoho, kapa ho iqalla khoebo ea ho betla lejoe, empa ke sa tsebe hantle hore ke lokela ho qala ho kae. E itse ha ke qeta ho ba le lelapa ke ile ka qala ho sebetso le Machaena ana a betlang lejoe Lekokoaneng mona. Ke sa tsebe letho ka lejoe feela ke e-na le lerato la lona le leholo. Ke hona moo ke ithutile ho



betla lejoe teng ho fihlela ke ba ke tseba ka tataiso ea basebetsi 'moho bao ke ba fumaneng ba sebetso moo. Ke rata ho ba leboha ka mokhoa o khetheleng, kaha ba ile ba mpha letsoho kahare.

Ha ke se ke fumane litsebo, ka itokolla mosebetsing ka 2017, 'na le ba bang bomphato ra iqalla likhoebo tsa rona ka ho fapakana, le hoja re ntse re kopane ho thAusana ha mosebetsi o le mongata le ka ho hlahlellana ka litsebo tsa ho khabisa lejoe. Re ile ra qala pele ka ho betla majoe a ahang, ha nako e ntse e tsamaea ra hlokomela hore tlhoko e kholo ea majoe a mabitla, ke ha re tla qala ho betla majoe a mabitla le ho etsa liemahale.

SEPHEO SA HO THEHA KHOEBO

Leha re ile ra qholotsoa ke ho bona tlhoko e kholo ea sechaba se hlohang majoe a matle a mabitla, taba e kholo ea rona e ne e le ho leka ho fokotsa bofuma, bo bonahalang li aparetse bacha ba bangata ba naha ea Lesotho. Re boetse re thusa ho phelisa malapa, kaha re le bahlankana ba bararo ba ikopantseng ba nang le malapa. Ha re ntse re sebetso le Machaena, re ile ra ithuta hore motho o lokela ho iketsetsa mesebetsi e mo phelisang a sa tšepa ho hiroa. Ke ka lebaka lena re ileng ra bona ho le bohlokoa ho ea iqalla mosebetsi ona oo re neng re se re ntse re o rata ka lipelo tsohle tsa

rona.

KHOEBO

Khoebo ena ea ka ke e etsang lihlahisoa tsa lejoe feela, 'me ha e-s'o ngolisoe ka molao, kaha ke hona e ntseng e hola. Joalokaha ho se tsela e hlohang moempa, liqholotso tse kholo tseo ke kopanang le tsona ke tse 'maloa tse kang khaello ea lisebelisoa, ho robeha ha tsona haholo-holo lehare le sehang majoe, e le hore re tsebe ho khabisa le ho betla re etse majoe a mabitla. Bacha ba bangata ha ba kena khoebong efe kapa efe ke ithutile hore ba tšaba liqholotso, empa 'na ha nkaba ka iphumana ke le letsoalong la ho tšaba ho qala khoebo, kaha ke ne ke se ke ntse ke tseba hore liqholotso ke karolo ea bophelo ba khoebo e 'ngoe le 'ngoe. Ke re le kajeno e ntse e-s'o tsitsi ka lebaka la maemo a teng a moruo empa nke ke ka fela matla.

KHOLO EA KHOEBO

Kholo ea khoebo ena ea ke ka lebaka la ho ikopanya le banna bane ba heso, ho fanana ka malebela a khoebo mona le mane. Ka ha ke etsa mofuta eohle ea majoe a hahang matlo, ke ithutile hore khoebo ena e batla e tsamaea hantle nakong ea Mariha, kaha lipula li se ngata haholo, 'me ke nako e ntle haholo eo batho ba hahang matlo ka eona. Haele ea majoe a mabitla eona e batla e sena nako eo re ka reng e tsamaea hantle ka eona, ho ba lefu

ha le reroe ke motho ke Morena Molimo feela ea tsebang hore na re tla tloha neng lefatšeng lena le hona ka mokhoa o joang.

BOHLOKOA BA KHOEBO

Ke hlokometse hore bophelo bo teng khoebong ena, 'me mosebetsi oo reo e tsang ke oa morafu, empa re hloka letsoho la bobeli le ka re thusang ho etsa mosebetsi o tsoileng matsoho, e kaba 'muso kapa bahoebi ba seng ba iphumane ba boithatelo bo botle. Khoebo ena e fetola bophelo ba ka le litsela tseo e bang ke ne ke ntse ke phela ka tsona pele. Haeba mohlomong ke ne ke le motho ea noang, e nthusa hore ke be motho ea nang le boitšoarobottle lipuong le liketsong tsa ka, ho ba nako e ngata ke e qeta ke le mosebetsing. Ha ke tloha mona ke leba hae ke il'o phomola ke shebana le litaba tsa lelapa la ka. Ka 'nete ke khothaletsa bacha ho iqalla likhoebo, kaha li ka ba thusa ho bantša linthong tse ngata tse ka silafatsang bophelo ba bona.

BOKAMOSO BA KHOEBO

Ke lakatsa ho bona ke ena le mechini e mehoro e tlanthusa ho fata majoe ana ao ke ea sebelisang ho etsa lihlahisoa ka ona. Ke hloka ho ba le koloi e kholo ea 'truck', eo ke tla tseba ho thusa bareki ba ka ha ba hloka ho isetsoa majoe a hahang le a mabitla, ba se ke ba sokola joaloka hona

joale hoo ba tlamehang hore ha ba rekile majoe ba boele ba batle koloi e tla ba isetsa ona mahaeng a bona.

KHOTHALITSO HO BACHA

Ke khothaletsa bacha ho ikopanya, ka litsebo tseo ba nang le tsona, ho ithehela likhoebo tsa mofuta ona, tse se nang ho hloka litšenyeho tse ngata tsa ho qala e le mekhoha ea boipheliso le ho arolelana litsebo tseo ba nang le tsona. Ka hona ke hoehla bacha bohle ka letsoho la moea literekeng tsohle tsa Naha ea Lesotho, ho ikopanya le ho hlahisa litalenta tsa bona molemong oa ho iphelisa ka tsona le naha ea habo bona.

BOIPILETSO HO 'MUSO

Ke ipiletsa ho 'muso oa habo rona hore joalokaha o ntse o thusa bacha literekeng ka ho fapakana ha tsona, le rona ka mona ka khoebong ena ea majoe, o ke o re khahametse ka lisebelisoa tse nepahetseng tsa ho betla lejoe, ka ha re batla ho bona re ena le feme e kholo e fetang ena ea Lechaena e hlahisang majoe ka mofuta ea ona. Re kopa bahoebi kapa 'muso o ke o re thusa haholo-holo ka thepa, kaha ha re hloke ho hiroa re batla ho iketsetsa ka matsoho a rona. Rea kopa 'muso o ke o re shebe ka leihlo la mohau joalokaha o ntse o thusa likhoebo tse ling.

Harvest FM e otlala bana

Nthabeleng Seitlheko

Mongoli e Moholo Lekaleng la Thuto le Koetliso, Mong. Ratšiu Majara, o thoholelitse Mookameli e mocha oa Sekolo se Senyenyane, TI-hohonolofatso Tšenoli. Ka la 1 Phupjane monongoaha.

Majara o ile a bua sena moketeng oa phetisetso ea mosebetsi o neng o tšoaretsoe Maseru, moo Harvest FM ka lenaneo la eona la "Kids Leadership Programme" e ileng ea nehelana ka mohloli ofising ea Lekala la Thuto, ea amoheleang ke mongoli e moholo le basebetsi ba phahameng ba lekala.

O ile a re Tšenoli (13), eo e leng moithuti Sekolong se Phahameng sa Lesotho, o fumane boemo bona ka ho sebetsa ka thata, ho khotlaetsa ba bang ho ithuta ka matla le ho sebetsa menyetla e fuoang bana ka boikarabelo.

O boetse a re Lekala la Thuto le ananela mananeo a kang ana a etsoang ke

Harvest FM, a thusang ho aha le ho holisa litalenta tsa bana. "Ka hona re leboha Harvest FM ka ho tšehetsa mosebetsi oa Lekala ho holiseng bana," ho boletse Majara.

O ile a khotlaetsa bana ho lula ba ikokobelitse le ha ba fuoa maemo a boetapele, a re hoo ho ba thusa ho

ithuta ho ba bang le ho hola ka bohlae le tsebo.

Ka lehlakoreng la hae, Mookameli e mocha, TI-hohonolofatso Tšenoli, o bontšitse thabo ho fuoa monyetla oo, a re tsebo eo a tla e fumana nakong ea boetapele ba hae e tla mo thusa ho hola le ho ba motho ea betere nakong e

tlang.

Mookameli ea tlohang, Khabane Ramoholi, o lakalitse Tšenoli mahlohonolo mesebetsing ea hae e mecha, a mo eletsa hore a be le pelo e ikemiselitseng ho ithuta le ho arolelana maitutlo.

Mookameli oa Harvest FM, Likopo Kolo, o itse tl-

holisano ena e qaliloe ho aha boitšepo ho bana, a hlalosa hore ho tloha ka 2018 ba qalile ka mekhahlelo e robeli 'me ha joale e se e holile ho fihla ho 11. O lakalitse baetapele bohle ba banyenyane katleho mesebetsing ea bona ea ho khotlaetsa litalenta tse fapakaneng.



Bahoebi ba khotlaetsoa ho akofisa litsebo ka AI



Nthabeleng Seitlheko

Letona la Tekano, Bacha le Ntšetsopele ea Sechaba, Mohlomphehi Pitso Lesaoana, hammoho le Boemeli ba United States Lesotho le American Corner, ba thakhotse ka molao Lenaneo la Koetliso ea Tsebo ea mahlale a Maitketset-

so (Artificial Intelligence - AI) tlas'a Sebatatso, e leng lenaneo la Tona-Kholo la ho matlafatsa bacha.

Tsena li bile ka la 1 Phupjane monongoaha. Puong ea hae, Mohlomphehi Lesaoana, o buile ka bohlokoa ba ho amohela marang-rang nakong eo lefatše le fetohang ka potlako. O re AI e fana ka menyetla e meholo ho likhoebo le bo-rakhoebob, ka hona ho bohlokoa hore Lesotho le se ke la sal-

la morao tsoelapeleng ea mahlale.

O khotlaelitse ba nkileng karolo ho sebetsa monyetla ona ka botlalo, a re tsebo le lisebelisoa tseo ba tla li fumana li tla ba thusa ho atlosa mebaraka ea bona le ho matlafatsa tholisano ea likhoebo tsa bona.

O phethetse ka hore ha ho motho ea ka iphapanyet-samg hore AI e teng e'a sebelisoa, empa e lokela ho sebelisoa ka tsela tse nepa-

hetseng tse tla ba molemo.

Ka lehlakoreng le leng, Moemeli oa Nakoana oa United States Lesotho, Thomas Hines, o re lenaneo lena le reretsoe ho hlomella bo-rakhoebob ka tsebo e sebetsang ea AI e ka ba thusang ho hokahana le mebaraka ea lefatše. O boletse hore bohlae ba maitketsetso bo ka ntlafatsa mekhoba ea papatso, ba eketsa ntšetsopele ea bamameli ba machaba le ho

matlafatsa meralo ea motho ea marang-rang.

O boetse a re mohato ona o tla kenya letsoho kholong ea moruo oa Lesotho ka ho khotlaetsa boqapi, khoebo le kholo ea likhoebo. Ho lebeletsoe hore lenaneo lena le tla fa bohle ba nkileng karolo tsebo le bokhoni ba marang-rang bo hlokalang ho boqapi, bo-rakhoebob le baetapele ba atlehileng mehleng ena ea marang-rang.

Mokhohlane o qhoma litererekeng tse supileng

Nthabeleng Seitlheko

Lekala la Bophelo le ntšitse polelo ka la 2 Phupjane monongoaha, moo le supang ha le fumane litlaleho tsa lipalo tse phahameng tsa bakuli ba lefu la mokhohlane (flu) ka khoeli ea Motšeanong monongoaha.

Tlaleho ena e hlaha litererekeng tse supileng eleng: Botha-Bothe, Berea, Maseru, Thaba-Tseka, Mafeteng, Mohale's Hoek le Quthing. Polelo e re lefu lena le bonahetse likolong le metseng. Lihlopha tsa litereke tsa liphuputso li ntse li etsa liphuputso ho fumana sesosa, lipalo-palo tsa batho ba amehileng, ho fumana kalafo le ho fana ka thuto ho sechaba. E tsoetsepele hore Naha ea Lesotho e kene kahar'a nako ea Mariha, moo lefu la mokhohlane le bonahalang haholo.

Lekala la Bophelo le ntse le emetse lipheto tsa sesosa sa mokhohlane ona ho tsoa litsing tsa tlhahlobo, lekala le khothaletsa sechaba ho ikamahanya le mekhoha ea thibelo le toantšo ea mafu a amang sefuba, ho kenyeletsa lefu la mokhohlane

Matšoao a lefu lena a kenyeletsa, mocheso, ho khohlola, hlooho e bohloko, bohloko ba mesifa le manonyeletso, 'metso o bohloko le mamina a mangata. "Boholo ba batho ba fola ka nako ea beke. Empa ho na le karolo ea batho ba tlokotsing ea ho ba le lefu lena ka sekhahla se ka bakang le tahlehelo ea bophelo ho bao le ba tšoereng." Ho rialo polelo ea lekala.

Batho ba joalo ke ho kenyeletsa bakhachane, bana ba lilemo li hlano ho ea tlaase, batho ba lilemo li 65 ho ea holimo, le batho ba nang le HIV/AIDS,

E re kokoana-hloko ea mokhohlane e feta ho tloha ho motho e mong ho ea ho e mong ea nang le lefu lena, a hohlola kapa a thimola, kapa ha motho a tšoara matsoho kapa libaka tse silafalitsoeng ke kokoana-hloko ena, ebe ha a qeta o itšoara mahlong, linkong le molomong. Motho o qala ho bontša matšoao a flu ka mor'a letsatsi ho isa ho mat-



satsi a mane kamor'a ho tšoaetsoa.

Leha batho ba bangata ba fola kante ho kalafo, Lekala la Bophelo le eletsa sechaba ka kakaretso, haholo batho ba tlokotsing ea ho

tšoaroa ke lefu lena, ho etela Litsi tsa Bophelo tse haufi le bona, hang ha ba ba le matšoao.

"Mekhoa e meng ea ho le thibela e kenyeletsa ho koahela nko le molo-

mo ha motho a hohlola, kapa a thimola ho sebelisa semonkoana, ho hlapa matsoho ka sesepa le metso a phallang le ho qoba ho ba libakeng tse nang le tšubuhlellano."

Polelo e phethetsoe ka hore lefu la mokhohlane le tloaelehile nako ea Mariha, Lekala la Bophelo le tla tsoela-pele ho matlafatsa lipatlisiso le tšalo-morao libakeng tse amehileng.

Banna e be basireletsi ba malapa – LMPS

Nthabeleng Seitlheko

Sepolesa sa Lesotho (LMPS) se bile le kopano e khethehileng ea banna Teya-Teyaneng, e kopantseng litho tsa sechaba ho buisana ka maano a ho felisa tthekefetso khahlanong le basali le bana. Tsena li bile Berea ka la 2 Phupjane monongoaha.

'Mookameli oa Sepolesa Seterekeng sa Berea, Senior Superintendent Kabelo Halahala, o re tthekefetso khahlanong le basali le bana ha e amohelhe ho hang. O hlalositse hore kopano e ne e reretsoe ho thusa banna ho utloisisa liphe-toho tsa kajeno likamanong le sechabeng, kaha mekhoha ea bophelo e ntse e fetoha

letsatsi le letsatsi.

Superintendent Thoma Sefhaphathi o re sepheo e ne e le ho lumellana ka litsela tsa ho loantša tlolo ea molao, le ho arolelana likeletso lipakeng tsa banna. O totobalitse hore tthekefetso ea bana, basali le maqheku e ntse e le bothata bo boholo, 'me hangata banna ba bonahala e le bona ba etsang lithekefetso tsena.

Senior Inspector Petje Teke oa Child and Gender Protection Unit (CGPU) o re banna ba lokela ho fetola maikutlo le boitšoarano mabapi le litaba tsa thobalano. O hatelletse hore likamano tsa thobalano li lokela ho ipapisa le tumellano feela.

O itse ka selemo sa 2025, Lesotho e tlalehile linyeoe tse 897 tsa tthekefetso, moo tse 380 li neng li ama bana, ha tse 517 li ama batho ba

baholo. O boetse a lemosa banna hore ke basireletsi ba basali, bana le banna ba bang, a tiisa hore ho kopanela likamano tsa thobalano le motho ea sa lumelang, ea robetseng kapa ea tahi-loeng ke tlolo ea molao ka matla. O khothalelitse hore linyeoe tsa tthekefetso li tlalehoe kapele ho thusa ho thibela bokhachane bo sa reroang, mafu a tšoaetsanang ka thobalano le HIV, le ho thusa ba utloisitsoeng bohloko ho fumana thuso.

Ho ea ka UN Women, lefatšeng ka bophara, mosali a le mong ho ba bararo o kile a ba le hlekefetsoa e bophelong ba hae, e leng pontšo ea hore GBV ke bothata bo boholo lefatšeng lohle, eseng Lesotho feela.

'Mannabi Lephoto oa Gender Links o re banna le bona ba ka hlaseloa ka tthekefet-

so, haholo-holo ka mantsoe, ka hona a ba khothaletsa ho ithiba le ho qoba liketso tse ka bakang likhohlano le molao.

Banna ba bileng teng kopanong ba sisintse tharollo tse fapakaneng, ho kenyeletsa ho etsa mesebetsi ea matsoho ho boloka banna ba phathahane, ho loantša tšebeliso e mpe ea lithetefatsi, ho theha likomiti tsa metseng tse shebaneng le litaba tsa banna le bashanyana, ho kenyeletsa baruti lipuisanong tsa banna, le ho ruta banna ho itlhalosa le ho batla thuso ka tsela e nepahetseng.

LMPS e phethetse ka pitso e matla ea hore banna ba nke boikarabelo e le basireletsi ba malapa le sechaba, e le hore tthekefetso khahlanong le basali le bana e fele ka ho feletseng Lesotho.

Tsela ea Semphetenyane e tla kena meralong ka 2027

Nthabeleng Seithleko

Letona la Puso ea Libaka le Borena, Mohlomphehi Nk-hethoa Seetsa, o tšepisitse hore ho tla nkoa mehato e potlakileng mabapi le tsela ea Semphetenyane e senyehileng haholo, a re o etetse sebaka seo ho ea iponela maemo ka maholo le ho phetha litšepiso tse entsoeng ke baetapele ba sebaka.

H'a bua nakong ea ketelo ea ho lekola boemo ba tsela, ka la 2 Phupjane Monongoaha. Letona Seetsa o itse o mocha lefapheng lena empa o tlile ho mame-la ka kotloloho seo Ramotse Relebohile Sechache le Setho sa Paramente Mohlomphehi Itumeleng Rantšo ba se buang ka merero eo ba ikemiselitseng ho e phetha.

"Ke motho ea ratang ketso, ke tla latela sohle seo ba se buileng, 'me ke tšepisa hore mosebetsi o tla qala haufinyane," ho boletse Letona.

Setho sa Paramente, Mohlomphehi Itumeleng Rantšo, o itse ketelo ena e ne e reretsoe ho hlahloba tsela eo e leng khale e le maemong a mabe, empa a tšepisa hore ba tla sebetsa ho e lokisa haufinyane. O boletse hore o kile a hlalisa taba ena Paramenteng, empa tsoelo-pele e liehile ka lebaka la mathata a lichelete.

"Ona ke mosebetsi o seng o ntse o qaliloe, empa re ile ra tlameha ho emela hore liphaephe tsa metsi tsa WASCO li lokisoa pele," o hlalositse.

Rantšo o boetse a re ho entsoe boiteko ba ho lokolla batho ba neng ba tsoaretsoe lipelaolong tse amanang le boipelaetso ba morao tjena mabapi le tsela ena.

Ka lehlakoreng le leng, 'Malillo Mohashole o bontšitse ho se khotsofale ka ketelo ea Letona, Ramotse le ba bang ba boholong, a re ha e na ho tlisa phetoho.

O itse o lutse Semphetenyane nako e telele haholo 'me tsela e ntse e le boemong boo ho tloha khale haholo.

"R hloka phetoho le lintlafatso ka khetho ea rona, ha hon sechaba se sotlehileng joaloa rona Lesotho mona empa ba khethang" ke eena eo.

Ha emong oa bahoebi ba ntseng ba thuthusa, Lebasa Masenyetse 33, a hlalositse hore khoebo tsa bona li putlame kaha ba sitoa le ho ea setokong ka nako. Ha



ntle esale re sotleha, sebaka sena ekare ha se maseru lintlafatso ho rona ha li fihli hohang.

"ho palama motho a tla sebakeng sena ho nka nako e telele, ha koloi e sa tlale batho ha ba ikamahanye ka

ho nka maeto, a the bakoloi tse nyane ba re lefisa haholo" ke eeno.

O re liketsahalo tse knag tsena li ea nyhamisa hoo ba bo nang ho sena lebaka la ho khetha.

Lekhotla la Motse-Moholo

Maseru, MCC le re tsela ea moshoelella ea Semphetenyane e tla kenella likhakan-yong tse tlang tsa lichelete. H'a joale ho rarolla bothata le tla tipela koari ho e kata molemong oa hore sechaba se tsebe ho phetha

maeto ka thello,

Lekhotla la toropo, 'Moea Makhakhe o buile litabaa tsena 'mokeng oa bo-ralita-ba ka la 2 Phupjane Monongoaha. o itse Lekhotla la habo le tla sebelisa M80million maluti tse tlo sebelisetsoa ho ntlafatsa litsela, mabatoong a Thetsane, Central le Likotsi, ka mokhoa oa tšebeliso ea litene tsa Paving, ha litsela tse hokahanyang mabatoona ho tla etsoa tse 12 tsa lehlohlo-jane.

O tsoetse pele hore litsela tsa Maseru li nkile lilemo tse tšeletseng li sa lokisoa, ka lebaka la ho robeha ha mechini le ho se abeloe lichete hore ba nolofalloe keho etsa mosebetsi. A re ba ea tseba litsela li mpe li senyehile ba kopa sechaba ho khoba matšoafo kaha ba tla qetella ba arabile lithoko tsa bona.

Motlotlehi 'Masenate o qeta lilemo tse 50

Nthabeleng Seithleko

Basotho ba tsoang mekhahlelong e fapakaneng ea sechaba, baetapele ba 'muso, litho tsa Lelapa la Borena, likhoebo le balumeli ba ile ba kopana ho keteka letsatsi la tsoalo la Motlotlehi Mofumahali 'Masenate Mohato Seeiso, ka thapelo e khetheleng e ileng ea qala ka Sehlabelo se Halalelang sa 'Missa kerekeng ea Mofumahali oa Tiholo ka 2 Phupjane monongoaha.

Sehlabelo sena se ne se eteletsoe pele ke Mobishopo John Joale Tihomola SCP, ea ileng a re ho fihlela lilemo tse 50 ke pontšo ea mohau le botšephehi ba Molimo. O boletse hore jubilee ena e emela pholiso, poelano le qalo e ncha.

Thutong ea hae Mobishopo Tihomola o ile a thoholetsa boitelo le tšebeliso ea Motlotlehi ho sechaba, lelapa le kereke, a mo lakaletsa bophelo bo botelele, bohlale le matla a ho tsoela pele ho sebeletsa sechaba hammoho le Motlotlehi Letsie III.

Ketsahalo ena e bonoe ke Basotho ba mekhahlelo e fapakaneng, mekhatlo, likhoebo le baeti ba khetheleng ba ileng ba romela litakaletsa tse molemo ho Motlotlehi, ba mo lebohela letsatsi la hae la tsoalo le ho mo lakaletsa katleho, bophelo bo botle le lithohonolofatso tse ngata lilemong tse tlang.

Mokete ona ke karolo ea mekete ea jubilee ea khauta



ea Motlotlehi 'Masenate Mohato Seeiso, e ketekoang ke Basotho ba tsoang likarolong tsohle tsa naha ho mo hlompha ka lebaka la tumelo, boetapele le tšebeliso ea hae ho bona.

Motlotlehi 'Masenate Mohato Seeiso o hlahile ka la 2 Phupjane 1976 Sepetleleng sa Maluti Adventist, Mapoteng, Seterekeng sa Berea. O hlahile e le Anna Kara-

bo Motšoeneng, morali oa matsibolo oa nate Thekiso le 'm'e 'Makarabo Motšoeneng.

O ile a kena sekolo sa Machabeng International College Maseru ho tloha ka 1990 ho isa 1996, moo a ileng a fumana thuto ea bohareng. Ka 1997 o ile a tsoela pele lithutong tsa hae ka Sekolong se Seholo sa Sechaba (NUL). 'M'e


'Masenate o kopane le Motlotlehi Letsie III ka 1996, 'me ba nyalana ka la 18 Hlakola 2000.

Lilemong tsena tsohle, Motlotlehi 'Masenate o tsebahala ka ho tšehetsa mesebetsi ea boiketlo ba sechaba, bophelo bo botle, bana le malapa, hammoho le ho emela Lesotho liketsahalang tsa naha le tsa machaba.





MOB Kidds Edutainment




Across

- 3 Nama e fuoang ea neng a phehile. (10)
- 5 Liphehiso moketeng oa lenyalo. (7)
- 8 Leqa le tšoloang pitseng e ifo, ho utloa hore nama ha e-s'o butsoe. (10)
- 9 Nama ea letheka. (12)
- 11 Nama ea katse. (10)
- 13 Lijo tsa letsema. (6)
- 14 Nama e hlabeoang thekiso. (6)
- 15 Nama e salang moketeng oa bohali. (5)

Down

- 1 Karolo ea qati e silang joang hore bo fetohle bolokoe.(10)
- 2 Nama e phehiloeng ka pitsa e nyenyane. (10)
- 4 Ntho e monate ha e jeoa. (9)
- 6 Nama e thata ke ho se butsoe hantle. (9)
- 7 Tsie e besitsoeng. (11)
- 10 Lijo tsa mokete oa bale. (7)
- 12 Makoeba a poone ea lehoetla ha e nepoloa. (6)

Likarabo tsa Puzzle MOB 94-4633





TSA KEREKE


'Fr. Gerard mohlala oa khalalelo'

Tšeliso Thakholi

Balumeli ba Kereke e Katholike Lesotho ho hlaha litikolohong tse 'ne tsa naha, ba ile ba khobokana ka bongata bo boholo Parishing ea Ha 'Ma-Jesu, Roma, bosuing ba la 29 ho isa mesong ea la 30 Motšeanong monongoaha, moketeng oa selemo le selemo oa Fr. Joseph Gerard OMI ea Lehlohonolo le ho rapela hore ka mehlo eo a ntseng a tsoelapele ho e etsesa sechaba sa More-

na Molimo le kajeno, a ke a fetisetsoe mokhahlelong o mong o hlahlamang, oa Bohalaleli. Mokete oa monongoaha oo mohoo oa ona e neng e le "Ntate Gerard mohlala oa khalalelo!" O ile oa qala ka hlomphe ea Sakramente e Halalelang, ea e-ba Sehlabelo se Halalelang sa 'Missa, se neng se bula mokete. Ea nt'o ba Sakramente ea Pholiso e leng ea bakuli, 'me ha latela thuto ea pele e mabapi le Fr. Gerard mohlala oa khalalelo ho Mobabatsehi Emmanuel Mabathoana

OMI, e ileng ea fanoa ke Fr. Clement Motlaopa OMI. Fr. Motlaopa o boletse hore Mobabatsehi Emmanuel Mabathoana o ile a bona khalalelo ho Fr. Joseph Gerard ea Lehlohonolo ka lebaka la ka moo a neng a phela le ho etsa lintho ka teng. A re bophelo ba Fr. Gerard ea Lehlohonolo bo ile ba etsa hore a utloe a hoheleha hore le eena a ka mo etsisa. "Mehlala eo Mobabatsehi Mabathoana a ileng a e bona ho Fr. Gerard ea Lehlohonolo, eo a ileng a khahloa haholo ke



ka lebaka la ho rata batho ba ile ba sebetsa ka sebete, ka lipelo tsohle le ka meea eohle ea bona. O itse har'a tse ling tseo Fr. Gerard ea Lehlohonolo a ileng a li sebeletsa ka har'a sechaba sa Basotho, ke bonngoe le ho bopa Makatholike hoba ngatana-'ngoe e le hore ba tsebane le ho boulelana. "Ka lebaka la lerato le tebileng leo a neng a e-na le lona ho Basotho, o ile a hloma lie-mahale tse ngata tse kang likolo, lipetlele le tse ling. "O boletse joalo a bile a phethela ka hore e kholo eo a ileng a e tsoaetsa Mobabatsehi Mabathoana ke thapelo, "hobane ha hona mosebetsi oo motho a ka o e tsang kantle ho thapelo." Thuto ea bobeli e ile ea fanoa ke Fr. Manocha Thaba, e ne e le holim'a Lireleka le Lisakramentali tsa Fr. Gerard ea Lehlohonolo, moo a ileng a bontša hore lireleka li mefuta e meraro, oa pele ke 'mele kapa karoloana ea masapo a hae, ea bobeli ke karolo ea seaparo sa hae, kapa lijana tseo aneng a li sebelisa ha ea boraro e le se thitsitseng 'mele oa hae kapa lebitla la hae joaloka mobu o thitsitseng lebitla la hae. "Hona lereleka ea hae eo re e akang hore a re tsoaetse khalalelo." Fr. Thaba eo.

H'a koala Mokete ona o Moholo ka Sehlabelo se Halalelang sa 'Missa, Mobishopo oa Leribe, Mohlomphehi Vitalis Marole OMI, khotatsong ea hae o itse ka bophelo ba Fr. Gerard ea Lehlohonolo Morena Molimo o re etetse, 'me bohle ba bileng teng moketeng ona oa hae oa boithuto, re 'ne re tsoelepele ho ithuta ka Maria Movirigo eo ho latela Mangolo a Halalelang a ileng a amohela ho ba 'm'a Morena oa rona Jesu Kriste. "Fr. Gerard o ithutile mesebetsi ea khalalelo ka Maria Movirigo, 'me re bone le ka mapaki a fanoeng ka mesebetsi ea hae hore o ntse a le teng kahare ho rona." A rialo.

ona, ke lerato leo a neng a rata sechaba sa Basotho ka lona, hobane motho h'a ronngoe ho batho o lokela ho ba rata." A rialo. A re lerato lena leo Mobabatsehi a neng a rata Basotho ka lona o le bone ho Fr. Gerard ea Lehlohonolo, 'me la thophothela ho eena, la etsa hore a shoe mefokolong ea hae a be le khalalelo, hobane lerato ke tholoana ea Moea o Halalelang. A re bahlanka bana ba Morena Molimo ka bobeli ba ile ba rata sechaba sa Basotho ho isa lefung, 'me

2025-2026 SELEMO A MOKETE-MOLIMO



Deut. 8:2-3.14-16
Pesalema 147
1Ba-Korinthe 10:16-17
Joannes 6:51-59



Khothatso

MOKETE-MOLIMO

Kajeno ke Mokete-Molimo, ke mokete oa lerato la Morena Moimo ho rona. Pelong ea motho e mong le e mong, peo e teng e nyenyane empa e matla, e fetang ntho tsohle tse ling tsa lefatše ka matla: peo ena e tsotsehang ke lerato. Bophelo bohle ba rona bo tsamisoa ke lerato. Ngoana oa lesea o rata 'm'ae 'me ha utloisisi ho arohana le eena, o mo sala morao kahohle; ha 'm'ae a mo siea, oa lla; h'a mo pepa, ngoana o khaotsa hang-hang ho lla, hobane o haufi le 'm'ae h'a tšabe letho. Ke lerato le khannang bahlankana le baroetsana hore ba ratane 'me ba hlome lelapa le lecha. Ke lerato le phelising monna le mosali 'me le ba thusa ho jara mathata a bophelo le ho holisa bana ba bona. Hape ke lerato le khannelang ba bang ho inehela ka ho tla ho Morena Molimo: baprista, baillami le banna kapa ba basali ba tsamaisoang ke lerato le lehlo, le matla, le etsang hore ba furalle tsohle tsa lefatše ho rata Morena Molimo ka mokhoa o phethehileng.

Ho thoe lerato le na le matla a maholo, a makatsang, a hlang matla 'ohle a mang a lefatše, esita le mollo kapa metsi, kapa le lona lefu li sitoa ho timetsa lerato la motho. Leha ho le joalo, lerato la rona lea fokola ha re le bapisa le lerato la Morena Molimo. Lerato la rona lea fokola, ka nako e 'ngoe ha lea hloeka, ka nako e 'ngoe le batla le feela. Lerato la rona le fokola hobane ke lerato la batho ba fokolang, bana ba Adama le Eva. Lerato la rona ke setsoantšo feela sa lerato la Morena Molimo. Bibeleng, re bala hore Morena Molimo o ile a re bopa a re tsoantša le eena. Rona batho re litsoantšo tsa Morena Molimo. Lerato la rona ke setsoantšo feela sa lerato la hlolang la Morena Molimo oa rona.

La baka la lerato la hae, Morena Molimo o ile a re bopa, a re abela lehlohonolo la hae, 'me, kamorao ho sebe sa batsoali ba rona ba pele, o ile a romella Mora oa hae lefatšeng ho re pholosa. A re romela Moea o Halalelang ho re tataisetsa tselang ea lehloholimo. H'a le lefatšeng, Jesu o ile a re bontša lerato la hae, ka ho folisa bakuli, ho leleka bademone, ho tsosa bafu. Hape, ka baka la hobane o n'a re: "Ha ho lerato le lehlo, leo motho a ka bang le lona, le fetang la motho ea telang bophelo ba hae, ka baka la metsoalle ea hae," Jesu o ile a re shoela sefapanong ho re lopolla. Teng e bile bopaki bo boholo ba lerato la hae ho rona.

Empa le teng, Jesu h'a ka a khotsofala ke ketso ena e makatsang ea lerato. Ha a se a tla arohana le baapostola le barutuo ba hae, o ile a hloma sakramente ea Eukariste, hore a tle a tsebe ho lula le rona kamehla le kahohle. Ka Labone le Halalelang o ile a nka bohobe, a re: "Hona ke 'mele oa ka." A nka le senoelo sa veine, a re: "Hona ke mali a ka." 'Me a fa baapostola bohobe bona le veine ena hore ba je 'me ba noe. Jesu o ile a iketsa sejo sa meea ea rona. Ke mister, ke ntho e fetang kutloisiso ea rona; ruri ke mehloho oa lerato. Batho ba ratanang ba rata ho lula hammoho kamehla, 'me o fumana mokhoa oa ho etsa joalo. Jesu o rata ho fepa meea ea rona ka 'mele le ka mali a hae. O itse "ea jang nama ea ka 'me ea noang mali a ka o tla ba le bophelo." Joalokaha Baheberu ba ile ba phelisoa felleng ke lijo tsa mehloho tse bitsoang "manna", joalokaha ba ile ba pholoso ka mali a konyana ha ba e-tsoa Egepeta, ka mokhoa o tsoanang, Jesu o fepa meea ea rona ka 'mele le mali a hae. Mohlala o mong o ka re thusang ho utloisisa hanyenyane mehloho ona oa lerato, ke mokhoa oo ngoana a phelang ka oona popelong ea 'm'ae. H'a je, h'a noe, o phelisoa ke 'm'ae, o etsa ntho e 'ngoe le 'ngoe ke eena: 'mele oa hae ke 'mele oa 'm'ae, mali a hae ke mali a 'm'ae. A ke ke a phela kantle ho 'm'ae. Ha 'm'ae a ka shoa, ngoana ea phelang ka ho eena le eena o tla shoa, a ke ke a phela.

Joale re utloisisa mantsoe a Jesu h'a re: Ha le sa je nama ea ka le sa noe mali a ka, le ke ke la ba le bophelo ka ho lona. Ea jang nama ea ka, a e-noa mali a ka, o na le bophelo bo sa feleng, o lula ho 'na le 'na ho eena. Re utloisisa le litsoanelo tsa rona mabapi le mehloho ona oa lerato e leng sakramente ea Eukariste. Ha Jesu a rata ho lula le rona, le rona re etsa ka matla 'ohle a rona ho lula le eena, ho mo chakela moo a leng teng, ho lula pel'a hae le ho qoqa le eena joaloka batho ba ratanang. Re mo amohela khafetsa sakramenteng ea Eukariste, hore a fepe meea ea rona, a matlafatse 'me a hloekise lerato la rona, a phele ka ho rona hore liketso tsohle tsa rona e be tsa hae, mehopollo eohle ea rona e be ea hae, lipolelo tsohle tsa rona e be tsa hae. Re etse ntho e le 'ngoe le eena, re phelisoa ke eena.

Ha re ka etsa joalo, Jesu ea lulang ka ho rona, o tla re tlama ho etsa thato ea hae, o tla re tsamaisa tseleng e nepahetseng kamehla, o tla re jarisa sefapano sa hae ka nako e 'ngoe, empa ka matla a hae re tla tseba ho phonyoha litsietsi re tle re finyelle le eena lehlolimong, 'musong oa Nt'a'ae, 'musong oa lerato le sa feleng.

Bahalaleli har'a Beke

- 8 Phupjane Bron
- 9 Phupjane Diana
- 10 Phupjane Amata
- 11 Phupjane Tochmura
- 12 Phupjane Eskill
- 13 Phupjane Augustine oa Huy

E hapa Mohope oa Champ of Champs

Tšeliso Thakholi

Ho ile ha lubeha lebaleng la Bam-batha Sports Arena, Maseru, ka Moqebelo oa la 30 Motšeanong monongoaha, ha Kick4Life Juventude le Mzamane, li ne li tseka bompoli ba Liki ea A Division lipapaling tse neng li phethela Liki ea A Division tse tšehelitsong ke Ned-Bank Lesotho.

Lihlopha ka bobeli li ile tsa thulana sa lipheleu tjena kamor'a hore Kick4Life Juventude e hape liki ea A Division ea Mokhahlelo o ka Boroa ho naha, ha Mzamane eona e hapile ea Mokhahlelo o ka Leboea. Papali ena e qalile ka matla a maholo, kaha sehlopha ka seng se ne se bontša boikemisetso ba ho ikhapela eona.

Empa mohlankana ea neng a le kotsi haholo moleng o kapele oa Kick4Life Juventude e leng Seabata Pebane o ile a hlaba ntlha e ntle haholo karolong ea pele ea papali, kamor'a bohlasoa bo ileng ba etsoa ke Mzamane moleng o kamora. Papali e ile khefutsong Mzamane e se e ntse e fopha mali, empa ba ntse ba hateletse haholo sehlopha sa Kick4Life Juventude.

Ha li kena karolong ea bobeli lintho li ile tsa bonahala li fetohile haholo, kaha Kick4Life Juventude e ne e se e iketsetsa borata bohar-



eng ba lebala ka Mzamane. Le hoja e ne e ntse e leka ho hlasela e hlaha ka lepheong le letona le le letšehali, empa ea thula thaba ka phatla. Lekhetlong lena Kick4Life Juventude e ne e bonahala e sa tle ka matla a maholo joaloka pele, kaha Seabata Tsemene a hlile a fokolisa mola o bohareng oa Mzamane ka neheletsano e makhetha ea bolo le Tšepo Sekoboto. E itse moo Mzamane e sa ntse e leka ho tlisa maemo taolong, ke ha Lehlohonolo Khaile a hlaba ntlha ea bobeli ea Kick4Life ea eba 2-0, eba ho felile ke lehlohonolo. Papali ea fela e ntse e le 2-0.

Ho latela ka moo lipapali tsena li bapetseng ka teng, Kick4Life Juvantude joaloka sehlopha sa habo sona sa banana sa Kick4Life Women se sa tsoa hapa mohope oa Top 4 Mohale's Hoek libekeng tse fetileng, se bapetse ka boitelo bo boholo lipapaling tsena, kaha ba ile ba sheba tsela eo lihlopha tseo se neng se qothisana lehlokoa le tsona li neng li bapala ka teng ho fihlela ho sa ho qetela sa Mzamane.

Ho sa le joalo, mohloli oa NedBank 8 e bile sehlopha se secha haholo se sa tsoa kena Liki ea A Division e leng Bua-sono United kamor'a hore se hlole sa Mzamane

ka 2-0 papaling ea makhahla-khang. Bompoli ba ngoahola ba neng ba lokela hore ba sirelelitse mohope ona e leng Quthing LMPS, ba ile ba hloleha hoba har'a lihlopha tse 'ne tse ka holimo lokong ha lipapali tsa liki li fela. Bua-sono United e ile ea pokothela chelete e kaalo ka M35,000.00, mohope le limentlele tsa khauta.

O na e bile moralo o motle haholo oa sehlopha tsena tse peli e leng Bua-sono United le Kick4Life Juventude ha li ne li itokisetsa lipapali tsena tsa ho qetela tsa ho tseka bompoli ba A Division. Ka lehlakoreng le leng sehlopha sa Mza-

mane se sebelitse, le hoja se bonahetse hore sena le likhaello mona le mane, 'me se lokela ho ea itokisa hantle. Bobeli lihlopha tsena li kene lihlopheng tse kholo tsa Vodacom Premier League.

Ka bobeli li tla be li sa qale ho bapala lihlopheng tse kholo, kaha Kick4Life Juvantude e ne e rekisetsoe sehlopha sa Majantja, 'me sa boela sa khutla hape. Athe Mzamane e se ile ea kena liking e kholo ea selemo sa lipapali sa 2024/2025 'me sa tsoa. Ke sena se nkile selemo feela se boetse se khutlile hape ka matla a maholo.

Mehalalitoe ho Four Nations Tourney

Tšeliso Thakholi

Nakong ena eo Mokhatlo oa Lefatše oa Bolo ea Maoto (FIFA), o faneng ka phomolo ea libeke tse peli, ho lihlopha tsa bolo ea maoto lefatše ka bophara, Sehlopha sa Naha sa Basali, Mehalalito, se tlohile Motse-Moholo Maseru, ho leba Zambia ka 'Mantaha bekeng ena ho ea bapala lipapali tsa setsoalle tsa Mohope oa Zambia Four Nations FIFA Window Tournament ka la 6 ho isa la 9 Phupjane monongoaha, tlas'a mokoetlisi oa nakoana Monghali Tjamela Tjamela kamor'a hore konteraka ea

mokoetlisi oa pele Shalane Lehohla e fihle pheletsong.

Lihlopha tse kenetseng litholisano tsena tsa setsoalle ke Kenya e tlang ho koebana le Lesotho papaling e bulang lipapali tsena, e tlang ho bapalloa lebaleng la Mwanawasa, Ndola. Ha papali ea bobeli e tla ba lipakeng tsa Zambia e tlang ho koebana le Zimbabwe. Lipapali tsena li tlii' o thusa sehlopha ka seng ho inonyatla pele ho lipapali tsa tsona tse kholo tsa Mohope oa Women's Africa Cup of Nations (WAFCON), tse tlang ho tsoareloa Naheng ea Morocco ka la 25 Phupu ho isa la 16 Phato monongoaha.

Sehlopha sa Mehalalito e se tlang ho e lata letailane se eme tjena: lithibathibane

ke Lineo Fanyane, Nthabiseng Hlao le 'Mamotšea Moketa. Moleng o morao ke Liteboho Tjobe, Matšelis Makeke, Mahali Sepiriti, Matšelis Mosala, Bokang Ntsane, Mpho Molefe le Limpho Nthako.

Haele moleng o mpeng teng ke: Ntša Pelea, Rapelang Makhetha, Nthabeleng Potsane, 'Mampona Lekanyane, Lerato Shoaepane, Moseme Khashane, Lerato Tsoinyane, Motšelis Mocheso, Tebello Lekote le Molemo Mokothu. Athe ba mola o kapele ke 'Makhotso Moalosi, Litšeoane Maloro, Phuzile Molefe le Relebohile Jane.

Ho sa le joalo, Sehlopha Naha sa Likuena le sona se tla bapala lipapali tse peli tsa setsoalle le Harambee

Stars ea Kenya, lebaleng la Lucas Moripe, Afrika Boroa, ka la 4 le la 7 Phupjane monongoaha, e ntse e le ntšetso pele ea boitokisetso ba sona ba lipapali tsa Mohope oa AFCON 2027. Sehlopha sena sa Kenya se koetlisoa ke sebakali sa mehlang sa Bafana Bafana Benny McCarthy ea ileng a aha boiphihlelo ba hae litabeng tsa bokoetlisi nakong eo a neng a koetlisa lihlopha tsa Liki e Kholo ea Afrika Boroa e leng Cape Town le Amazulu.

Likuena e tlii' o bapala Mokhahlelong oa A le linaha tse kang Morocco, Gabon le Niger. Naha ea Kenya e Mokhahlelong oa D moo e tla kopana le Afrika Boroa, Eritrea le Guinea lipapaling tsa AFCON 2027. Lipapa-

li tsena li boetse li tlii' o fa mokoetlisi oa Likuena Monghali Bob Mafoso monyetla o motle oa ho itokisa, le ho bona hore na a ka bopa sehlopha sa mofuta ofe se tlang ho emela naha lipapaling tsa AFCON 2027.

E ntse e le boitoikiso, Bafana Bafana le Nicaragua li ile tsa pitikisa mahe (0-0), papaling ea tsona ea pele ea setsoalle e bileng lebaleng la Orlando Stadium, Soweto, ka Labone bekeng e fetileng. Papali ena e ne e le tlas'a botsamaisi bohloahloa ba baletsaphala ba Lesotho e leng Benghali Lebalang Mokete e le moletsa-phala, Souru Phatšoane e le mothusi oa pele oa moletsa-phala, Siza Dlangamandla e le mothusi oa bobeli oa moletsa-phala. Ha Skhumbuzo Gasa oa Afrika Boroa e bile eena ofisiri ea bone ea papali.

CFL e otlala talenta



Tšeliso Thakholi

Ele e meng ea mekhoha ea ho akofisa le ho kenya letsoho le toma kholong ea papali ea Chess kahar'a naha, Mokhatlo oa Lesotho oa Papali ea Chess (CFL), o ile oa tšoara litlholisano tsa 'Winter Chess Open' bakeng sa bana ba lilemo li 10 ho isa ho tse 14 le ba ba-

emela naha machabeng." Leha lipapali tse neng e bile tse ntle tse tsamaileng ka katleho e kholo, Mokhatlo oa Lesotho oa Papali ea Chess o ntse o e-na le qholotso e kholo ea banana le basali ba ntseng ba le lesisitheho ho ikakhela ka setotsoana papaling ea Chess. Ke ha litlholisano tsa mofuta ona li ntse li tšoaroa

hola, tse neng li tšoaretswe Lancers Inn, Maseru, ka la 31 Motšeanong monongoaha. Lipapali tse neng likhahla mahlo haholo mokhahlelong oa bana ba lilemo li leshome, Bokamoso Thaele o ile a ikhapela maemo a pele kamor'a ho itsamaela bolacha ka libapali tseo a neng a qothisana lehlokoa le tsona. O ile a putsoa ka mohope le khau

ea khauta. Hona baneng ba ntseng ba thuthuha, boemo ba bobeli bo ile ba nkoa ke Mphaphathi Letsie, ha Tebello Smous a ile a nka boemo ba boraro.

Hoba lilemo li 12, mohololi e bile Molibeli Ramabele ea neng a papala ka bokhabane bo boholo, 'me a ikhapela mohope le khau ea khauta. Haele bobeling ebile Bongani Mokoma, Naleli Khotle a hlaha borarong. Haele hoba lilemo li 14 Mokoma Khotso o ile a hla a itlhome pele ho fihlela lipapali li fela. Boemong ba bobeli le ba boraro ea eba Moorosi Keketsi le Tšuluba Tihonolofatso ka tatellano.

Mokhahlelo oa Open Sections o ile oa haptjoa ke George Mahommed ha Boitumelo Sethabathaba le Thato Moorosi, e le banana ba ipabotseng mokhahlelong ona. Bahloli ba ile ba fua limpho tsa bona le mehope mekhahlelong ehle.

Puisanong le Motlatsi oa

President ea Chess, Moorosi Moorosi o boletse hore bohlokoa ba litlholisano tse neng e bile tse ntle tse tsamaileng ka katleho e kholo, Mokhatlo oa Lesotho oa Papali ea Chess o ntse o e-na le qholotso e kholo ea banana le basali ba ntseng ba le lesisitheho ho ikakhela ka setotsoana papaling ea Chess. Ke ha litlholisano tsa mofuta ona li ntse li tšoaroa

emela naha machabeng." Leha lipapali tse neng e bile tse ntle tse tsamaileng ka katleho e kholo, Mokhatlo oa Lesotho oa Papali ea Chess o ntse o e-na le qholotso e kholo ea banana le basali ba ntseng ba le lesisitheho ho ikakhela ka setotsoana papaling ea Chess. Ke ha litlholisano tsa mofuta ona li ntse li tšoaroa



papali ea Chess, le ho fetola karolo ea bophelo ba bona. "Re boetse re holisa papali ena e le hore Naha ea Lesotho e tle e be le libapali tse chatsi tse ka tsebang ho

khafetsa, ho bile ho ntse ho eba le meputso e fanoang, ho ka bang le monyetla oa ho hohela banana le basali ho kena ka bongata papaling ea Chess.

O lakaletsa mabotho tsela-tšoeu

Tšeliso Thakholi

President ea Mokhatlo oa Lesotho oa Papali ea Cricket (LCA) Monghali Vijayakumar Bhaskaran o lakalelitse Mokhethoa oa Naha oa Papali ea Cricket tsela-tšoeu, ha se tloha Lesotho ka la 31 Motšeanong monongoaha ho ea koebana le lihlopha tsa Eswatini le Mozambique, litlholisanong tsa Machaba tsa Ubuntu Tri-Nations T201 Series Tournament.

Litlholisano tse neng tsa machaba tsa Tri-Nations tse hlophisitsoeng ke Mokhatlo oa Eswatini oa Papali ea Cricket li tšoaretswe Manzini, Eswatini ka la 1 ho isa ho la 8 Phupjane monongoaha. Lihlopha tse neng lipanoe ka tsela eo li tlang ho bapalana ho fihlela ho sala tse peli tse tlang ho nkhisetsana mahafi ho makhaola-khang. Sehlopha sa Naha sa Lesotho se bile le boitokiso bo lekaneng ba ho itlhophelela lipapali tse neng bohlokoa Tikolohong ea Afrika. Ka hona Basotho ba na le tšepo e tiileng ea hore bahlabani bana ba Lesotho ba tla beha naha 'mapeng.

H'a bua le sehlopha Ntlo-Khoho ea LSRC, Maseru, ka la 31 Motšeanong monongoaha, President ea LCA Bhaskaran o boletse hore lipapali tse neng

bohlokoa haholo, kaha li tliil'o sebelisoa e le sethala se tlang ho matlafatsa le ho holisa Sehlopha sa Naha sa Cricket, lipapaling tsa boemo ba machaba le ho bopa bonngoe ba sehlopha. A re



morero oa bona o moholo ka ho isa sehlopha se tlang ho emela naha lipapaling tsa Tri-Nations, ke ho phethahatsa boitlamo ba bona ba ho bona hore papali ea Cricket e'a hola kahare le kantle ho naha.

E khoho ka ho fetisisa ke ho tla fana ka boitšepo, sebetete le boiphihlelo lipapaling tsa machaba e le hore litlholisanong tse tlang tsa machaba, Lesotho le be le tseba ho qothisana lehlokoa le linaha tse ling maemong a machaba. A tiisa hore sehlopha se lokela ho fuma-

na lipapali tse 'maloa tsa machaba. Ka hona ba hloka tšehetso e khoho ea kha-ho ea mabala a boemo ba machaba, le batšehetsi ba papali ena ba kenye letsoho le toma ho holisa papali ea

Cricket kahar'a naha. "Re motlotlo ka sehlopha seo re se romelitseng lipapaling tse neng, 'me re na le tšepo e khoho ea hore se tla re tlela le tlhoho." Ke eena eo.

H'a bua le barati ba papali ea Cricket kapele ho baphatlalatsi ba litaba ba bileng teng 'mokeng oo, Mokoetlisi oa Sehlopha sa Naha sa Cricket, Alex Mavhiko o itse sehlopha sa habo se bile le lipapali tse 'maloa tsa boitokiso, 'me se malala-a-laotsoe ho tlela sechaba sa Basotho tlhoho. A re lipapali tse neng

papali feela tseo motho a ka itlosang bolutu ka tsona, empa li bohlokoa haholo, kaha li tliil'o matlafatsa le ho holisa sehlopha ho tseba ho bapala boemong ba machaba.

A tiisa hore ha hona hoba

bonolo haholo ho li hlola empa ba tliil'o etsa sohle se matleng a bona ho thabisa Basotho ka hoba tlela le tlhoho. A qetella ka ho supa hore ke ka tšehetso e matla ea Basotho ba tlang ho fihlela katleho. Ka hona a ipiletsa ho batho bohle ba boithatelo bo bottle ho tšehetsa sehlopha sa bona sa papali ea Cricket.

Haele moetapele oa Sehlopha sa Naha sa Cricket, Yunus Jakda puong ea hae e khutšoanyane, o boleletse bohle ba bileng teng 'mokeng ona hore ba ikemiselitse ho tlela Basotho le Lesotho tlhoho ka ho bapala papali e tsoileng matsoho. A bontša hore ba tliil'o tšehetsana le ho sebetsa 'moho e le sehlopha e seng mol'emong oa bona feela, empa oa sechaba sa Basotho ka kakaretso. A tiisa hore ba ipopile ngata na-'ngoe ho sebetsa ka thata e le ho tlela Basotho tlhoho.

